

Dame, li vostres fins amis

- letto 124 volte

Edizioni

- letto 89 volte

Wallensköld

I.

Dame, cist vostre fins amis,
qui tout son cuer a en vous mis
- de vos amer est si surpris
que de jor et de nuit est pris -,
vos mande que sachiez de voir
q'il vous aime sanz decevoir;
en vos amer n'a pas mespris.

II.

Dame, quant de vous me souvient,
une tel joie au cuer me vient,
qu'Amors me lace, qui me tient.
Vostre douz regarz me soustient,
qui soëf m'a le cuer enblé;
et souvent me ra il senblé
que de vous toute joie vient.

III.

Amors, aiez de moi merci,
que mon cuer, qui n'est mie ci,
fetes joiant, et priez li
que il li souviengne de mi!
Mès certes vous n'en feroiz rien,
que je vous aim seur toute rien;
pour ce sel metroiz en oubli.

IV.

Onques nus ne vos ama tant
com je faz, qui touz jorz entent

a vos servir veraiement.
Pour ce sont perdu li amant
que trop leur fetes acheter
ce dont il devroient chanter.
Deus! si fetes pechié trop grant.

V.

Dame, merci, merci cent foiz!
pitié vous praingne a ceste foi
de moi, qui sui ensi destroy
pour vous qu'or sui chaux, or sui froiz,
or chant, or plor et or souspir.
je conmant a vos mon espir;
ne sai se merci en avroiz.

- letto 71 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/dame-li-vostres-fins-amis>